

四庫全書

集部

欽定四庫全書

集部

唐詩品彙卷

三十九至
四十五

詳校官檢討

臣德生

助教

臣常循覆勘

總校官進士

臣朱

鈐

校對官編修

臣勵守謙

謄錄監生

臣

薛夢陽

欽定四庫全書

唐詩品彙卷三十九

明 高棟 編

五言絕句二

正宗

李白

靜夜思

牀前看月光疑是地上霜舉頭望明月低頭思故鄉

劉須

溪云自是古
意不須言笑

相逢行

相逢紅塵內高揖黃金鞭萬戶垂楊柳君家阿那邊

襄陽曲

且醉習家池莫看墮淚碑山公欲上馬笑殺襄陽兒

綠水曲

綠水明秋月南湖採白蘋荷花嬌欲語愁殺蕩舟人

玉階怨

玉階生白露夜久侵羅襪却下水晶簾玲瓏望秋月

劉云

玲瓏素淨可人自愧前作 蕭士斌云此篇無一字言怨而隱然幽怨之意見于言外

怨情

美人捲珠簾深坐嚙蛾眉但見汨痕濕不知心恨誰

秋浦歌

白髮三千丈緣愁似箇長不知明鏡裏何處得秋霜

劉云

後聯活活脫脫

真作家手段

觀放白鷹

八月邊風高胡鷹白錦毛孤飛一片雪百里見秋毫

初出金門尋王侍御不遇咏壁上鸚鵡

落羽辭金殿孤鳴咤繡衣能言終見棄還向隴西飛

憶東山

不向東山久蒿幾幾度花白雲還自散明月落誰家

獨坐敬亭山

衆鳥高飛盡孤雲獨去閒相看兩不厭只有敬亭山

自遣

對酒不覺暝落花盈我衣醉起步溪月鳥還人亦稀

奔亡道中作

蘇武天上田橫海島邊萬重塞斷關何日是歸年

杜陵

南登杜陵上北望五陵間秋水明落日流光滅遠山

夏日山中

懶搖白羽扇裸體青林中脫巾掛石壁露頂灑松風

劉云

後人以此語入畫真
復可愛妙是結句

九日龍山飲

九日龍山飲黃花笑逐臣醉看風落帽舞愛月留人

劉云

同是棹歌此
與童謡等爾

陪侍郎叔遊洞庭醉後作二首

船上齊橈樂湖心汎月歸白鷗閒不去爭拂酒筵飛
剗却君山好平鋪湘水流巴陵無限酒醉殺洞庭秋

送陸判官往琵琶峽

水國秋風夜殊非遠別時長安如夢裏何日是歸期

別東林寺僧

東林送客處月出白猿啼笑別廬山遠何煩過虎溪
見京兆韋參軍景移東陽

潮水還歸海流入却到吳相逢問愁苦淚盡日南珠
青溪半夜聞笛

羌笛梅花引吳溪隴水清寒山秋浦月腸斷玉關情
對雪獻從兄虞城宰

昨夜梁園雪弟寒兄不知庭前看玉樹腸斷憶連枝

劉云

藹然惻然
可以感動

王維

臨高臺

送黎拾遺

相送臨高臺川原杳何極日暮飛鳥還行人去不息

息夫人

莫以今時寵能忘舊日恩看花滿眼淚不共楚王言

劉云

正爾憊
悴得人

班婕妤二首

宮殿生秋草
君王恩幸疎
那堪聞鳳吹
門外度金輿
怪來粧閣閉
朝下不相迎
總向春園裏
花間語笑聲

劉云

語皆不
刺而近

雜詩三首

家住孟津河
門對孟津口
常有江南船
寄書家中否
君自故鄉來
應知故鄉事
來日綺牕前
寒梅著花未
已見寒梅發
復聞啼鳥聲
愁心視春草
畏向玉階生

送別

山中相送罷日暮掩柴扉春草年年綠王孫歸不歸

劉云

古今斷腸
理不在多

別輞川

依違動車馬惆悵出松蘿忍別青山去其如綠水何

崔九弟欲往南山馬上口號與別

城隅一分手幾日還相見山中有桂花莫待花如霞

留別崔興宗

駐馬欲分襟清寒御溝上前山景氣佳獨往還惆悵

山中寄諸弟妹

山中多法侶，禪誦自為羣。
城郭遙相望，唯應見白雲。

贈弟穆十八

與君青眼客，共有白雲心。
不向東山去，日令春草深。

劉云

淡淡
有情

哭孟浩然

時為殿中侍御史知
南選至襄陽有作

故人不可見，漢水日東流。
借問襄陽老，江山共蔡州。

鳥鳴澗

係雲溪
雜詠

欽定四庫全書

卷三十九

人閒桂花落夜靜春山空月出驚山鳥時鳴春澗中

劉云

皆非
著意

上平田

朝耕上平田暮耕上平田借問問津者寧知沮溺賢

劉云

語調
並高

孟城坳

係輞川
雜詠

新家孟城口古木餘衰柳來者復為誰空悲昔人有

劉云

復欲二語如此俯

仰曠達不可得

華子岡

飛鳥去不窮連山復秋色上下華子岡惆悵情何極

劉云

蕭然更

欲無言

鹿柴

去聲

空山不見人但聞人語響返景入深林復照青苔上

劉云

無言而

有畫意

南垞

音茶

輕舟南垞去北垞殊難即隔浦望人家遙遙不相識

歙湖

吹簫凌極浦日暮送夫君湖上一迴首山青卷白雲

白石灘

清淺白石灘綠蒲尚堪把家住水東西浣紗明月下

竹里館

獨坐幽篁裏彈琴復長嘯深林人不知明月來相照

辛夷塢

木末芙蓉花山中發紅萼澗戶寂無人紛紛開且落

劉云

其意不欲着一字漸可語禪

漆園

古人非傲吏自闕經世務偶寄一傲官婆娑數枝樹

朱子

語錄云摩詰荆川此詩余深愛之每以語人輒無解余意者 劉云便在謝東山輩口語皆成高韵

崔國輔

怨辭二首

妾有羅衣裳秦王在時作為舞春風多秋來不堪着
樓頭桃李疎池上芙蓉落織錦猶未成蟲聲入羅幙

古意

淨掃黃金堦飛霜皎如雪下簾彈箜篌不忍見秋月

魏宮詞

朝日照紅粧擬上銅雀臺畫眉猶未了魏帝使人催

長信草

長信宮中草年年愁處生時侵珠履跡不使玉階行

少年行

遺却珊瑚鞭白馬驕不行章臺折楊柳春日路傍情

湖南曲

湖南送君去湖北送君歸湖裏鶯鶯鳥雙雙他自飛

流水曲

歸來日尚早更欲向芳洲渡口水流急回船不自由

王孫遊

楚辭招隱士曰王孫遊兮不歸春草生兮萋萋王孫遊蓋出于此

自與王孫別頻看黃鳥飛應由春草誤着處不成歸

採蓮

玉淑花爭發金塘水亂流相逢畏相失並着採蓮舟

渭水西別李崙

隴右長亭候山深古塞秋不知嗚咽水何事向西流

孟浩然

宿建德江

移舟泊煙渚日暮客愁新野曠天低樹江清月近人

送朱大入秦

遊人五陵去寶劍值千金分手脫相贈平生一片心

送友之京

君登青雲去余望青山歸雲山從此別淚濕薜蘿衣

劉云

甚不多語神情悄然
比之蘇州特怨甚

同儲十二洛陽道中作

珠彈繁華子金羈遊俠人酒酣白日暮走馬入紅塵

下浙江

八月觀濤罷三江越海濤迴瞻魏闕路無限子牟心

春曉

春眠不覺曉處處聞啼鳥夜來風雨聲花落知多少

劉云

風流閣美
正不在多

楊子津望京口

北固臨京口夷山近海濱江風白浪起愁殺渡頭人

洛陽訪袁拾遺不遇

洛陽訪才子江嶺作流人間說梅花早何如此地春

劉云

便不着字
亦自深怨

尋菊花潭主人

行至菊花潭村西日已斜主人登高去雞犬空在家

--	--	--	--	--	--	--	--

唐詩品彙卷三十九

欽定四庫全書

唐詩品彙卷四十

明 高棅 編

五言絕句三

羽翼

儲光義

洛陽道四首 獻呂四郎中

洛水春冰開洛城春樹綠朝看大道上落花亂馬足

大道直如髮春日佳氣多五陵貴公子雙雙鳴玉珂
春風二月時道傍柳堪把上枝覆宮閣下枝拂車馬
洛水照千門千門碧空裏少年不得志走馬遊新市

長安道二首

西行一千里暝色生寒樹暗聞歌吹聲知是長安路
鳴鞭過酒肆袷服遊娼門百萬一時盡含情無片言

江南曲二首

綠江深見底高浪直翻空慣是湖邊住舟輕不畏風

日暮長江裏相邀歸渡頭落花如有意來去逐船流

關山月

一鴈過連營繁霜覆古城胡笳在何處半夜起邊聲

玉真公主山居

山北天泉苑山西鳳女家不言沁園好獨隱武陵花

王昌齡

題灞池

腰鐮欲何之東園刈秋韭世事不復論悲歌和樵叟

送李十五

怨別秦楚深江中秋雲起天長杳無隔月影在寒水

送張四

楓林已愁暮楚水復堪悲別後冷山月清猿無斷時

送郭司倉

映門淮水綠留騎主人心明月隨良掾春潮夜夜深

送胡大

荆門不堪別況乃瀟湘秋何處遙望君江邊明月樓

答武陵田太守

仗劍行千里微軀敢一言曾為大梁客不負信陵恩

題僧房

棕櫚花滿院苔蘚入閒房彼此名言絕空中聞異香

擊磬老人

雙峰褐衣久一磬白眉長誰識野人意徒看春草芳

裴迪

孟城坳

遊王維韜川
別業同賦

結廬古城下時登古城上古城非疇昔今人自來往

劉云

未為不佳興
維相去遠甚

鹿柴

去聲

日夕見寒山便為獨往客不知松林事但有麝麝跡

木蘭柴

蒼蒼落日時鳥聲亂溪水緣溪路轉深幽興何時已

宮槐陌

門前宮槐陌是向欽道秋來風雨多落葉無人掃

臨湖亭

當軒彌滉漾孤月正徘徊谷口猿聲發風傳入戶來

南垞

孤舟信風泊南垞湖水岸落日下崦嵫清波殊淼漫

樂家瀨

瀨聲喧極浦公涉向南津汎汎鳬鷗渡時時欲近人

白石灘

跂石復臨水弄波情未極日下川上寒浮雲澹無色

竹里館

來過竹里館日與道相親出入惟山鳥幽深無世人

杜甫

武侯廟

遺廟丹青落空山草木長猶聞辭後主不復臥南陽

劉云

語絕又云上句想望其風
采猶在也下句傷其已死

八陣圖

功蓋三分國名成八陣圖江流石不轉遺恨失吞吳

復愁

萬國尚戎馬故園今若何昔歸相識少早已戰場多

江天

多云先言今而後言昔無限
憂疑之意 劉云今又可知

歸鴈

東來萬里客亂定幾年歸腸斷江城鴈高高正北飛

答鄭十七郎一絕

雨後過畦潤花殘步屨遲把文驚小陸好客見當時

絕句三首

江碧鳥逾白，山青花欲燃。
今春看又過，何日是歸年。
江邊踏青罷，迴首見旌旗。
風起春城暮，高樓鼓角悲。
江動月移石，谿虛雲傍花。
鳥棲知故道，帆過宿誰家。

崔顥

長干行二首

君家住何處，妾住在橫塘。
停船暫借問，或恐是同鄉。

家臨九江水，來去九江側。
同是長干人，生小不相識。

劉云

只寫相問
語其情自見

江南曲

下渚多風浪蓮船漸覺稀那能不相待獨自逆潮歸

劉云

其詩皆不用思致而流麗
暢情固宜太白之所愛敬

高適

詠史

尚有綈袍贈應憐范叔寒不知天下士猶作布衣看

送兵到薊北

積雪與天迥屯軍連塞愁誰知此行邁不為覓封侯

田家春望

出門無所見春色滿平蕪可歎無知己高陽一酒徒

同羣公題張處士菜園

耕地桑柘間地肥菜常熟為問葵藿資何如廟堂肉

古今

詩話曰觀物有感則有興義蓋興近乎詘高適此詩則近乎詘矣作者知興詘之異始可言詩

岑參

行軍九日思長安故園

時未復長安

強欲登高去無人送酒來遙憐故園菊應傍戰場開

方虛

谷云
悲感

題平陽郡汾橋邊柳樹

參曾居此
郡八九年

此地曾居住今年宛似歸可憐汾上柳相見也依依

見渭水思秦川

渭水東流去何時到雍州憑添兩行淚寄向故園流

題三會寺倉頡造字臺

野寺荒臺晚寒天古木悲空階有鳥跡猶似造書時

王之渙

登鶴雀樓

白日依山盡，黃河入海流。欲窮千里目，更上一層樓。

王

詩話云：唐之中葉，文章特盛，其姓名煙沒不傳于世者甚衆。如河中府鶴雀樓有王之渙暢當二詩，皆當時名所不稱。嗚呼！後人以詩名者，豈能及之哉。

送別

楊柳東風樹，青青夾御河。近來攀折苦，應為別離多。

祖詠

終南望餘雪

終南陰嶺秀積雪浮雲端林表明霽色城中增暮寒

李適之

罷相作

避賢初罷相樂聖且銜杯為問門前客今朝幾箇來

李頎

奉送五叔入京兼寄綦母三

陰雲帶殘日悵別此何時欲望黃山道無由見所思

沈如筠

閨怨

雁盡書難寄，愁多夢不成。
願隨孤月影，流照伏波營。

崔曙

對雨送人

別愁復經雨，別淚還如霰。
寄心海上雲，千里長相見。

王縉

別輞川別業

山月曉仍在，林風涼不絕。
殷勤如有情，惆悵令人別。

劉云

清灑頓挫
畧不動容

丘為

左掖梨花

冷豔全欺雪餘香乍入衣春風且莫定吹向玉階飛

沈千運

古歌

北邙不種田但種松與柏松柏未生處留待市朝客

蕭穎士

欽定四庫全書

唐詩品彙

九

元日陪元魯山登北城留別二首

綿連漁川迥杳渺鴉路深彭澤興不淺臨風動歸心

其二

漸聞驚栖羽坐歎清夜月中歡愴有違行子念明發

元結

將牛何處去

將牛何處去耕破故城東相伴有田父相歡唯牧童

石宮夏詠

石宮夏水寒寒水宜高林遠風吹蘿蔓野客熙清陰

石宮冬詠

石宮冬日暖暖日宜溫泉晨光靜水霧逸者猶安眠

唐詩品彙卷四十

欽定四庫全書

唐詩品彙卷四十一

明 高棟 編

五言絕句四

接武_上

劉長卿

平蕃曲二首

渺渺成煙孤茫茫塞草枯隴頭那用閉萬里不防胡

絕漠大軍還平沙獨戍閒空留一片石萬古在燕山

湘妃怨

帝子不可見秋風來莫思嬋娟江上月千載空蛾眉

春草宮懷古

君王不可見芳草舊宮春猶帶羅裙色青青向楚人

斑竹

蒼梧千載後斑竹對湘沅欲識湘妃怨枝枝滿淚痕

逢雪宿芙蓉山

日暮蒼山遠天寒白屋貧柴門聞犬吠風雪夜歸人

送張起崔載華之閩中

朝無寒士跡家在舊山貧相送天涯裏憐君更遠人

送張十八歸桐廬

歸人乘野艇帶月過江村正落寒潮水相隨夜到門

送方外上人

孤雲將野鶴豈向人間住莫買沃州山時人已知處

送靈澈上人

蒼蒼竹林寺杳杳鐘時晚荷笠帶斜陽青山獨歸遠

瓜州送李端公

片帆何處去匹馬獨歸遲惆悵江南北青山欲暮時

送子壻往揚州

雁還空渚在人去落潮翻臨水獨迴首殘陽歸掩門

寄龍山道士許法陵

悠悠白雲裏獨往青山客林下晝焚香桂花同寂寂

茱萸灣北答崔載華問

荒涼野店絕迢遞人煙遠蒼蒼古木中多是隋家苑

贈秦系徵君

秦系頃以家事獲謗因出舊山每荷觀察崔公見知欲歸未遂感其

流寓詩

以贈之

初迷武陵路復出孟嘗門迴首江南岸青山與舊恩

又贈秦系

羣公誰讓位五柳獨知貧惆悵青山路烟霞老此人

江中對月

空洲夕烟歛對月秋江裏歷歷沙上人月中孤渡水

正朝覽鏡

憔悴逢新歲芳菲見舊春
朝來明鏡裏不忍白頭人

錢起

逢俠者

燕趙悲歌士相逢劇孟家
寸心言不盡前路日將斜

赴章陵酬李卿贈別

一官叨下秩九棘謝知音
芳草文園路春愁滿別心

送楊著作歸東海

楊柳出關色東行千里期酒酣覽輕別路遠始相思

過故李侍御宅

不見承明客愁聞長樂鐘馬卿何早世漢主欲登封

宿洞口館

一作歇
漳詩

野竹通溪冷秋泉入戶鳴亂來人不到寒草上階生

題崔逸人山亭

藥徑深紅蘚山牕滿翠微羨君花下醉蝴蝶夢中飛

石井

已下五首係
藍溪雜詠

片霞照仙井泉底桃花紅那知幽石下不與武陵通

古藤

引蔓出雲樹垂綸覆巢鶴幽人對酒時苔上閒花落

洞仙謠

幾轉到青山數重渡流水秦人入雲去知向桃源裏

竹間路

暗歸草堂靜半入花源去有時載酒來不與清風遇

遠山鐘

風送出山鐘雲迴度水淺欲知聲盡處鳥滅寥天遠

江行無題

元一百首
錄二十首

傾酒向漣漪乘流欲去時寸心同尺璧投此報馮夷
江曲全縈楚雲飛半自秦峴山迴首望如別故鄉人
行背青山郭吟當白露秋風流無屈宋空咏古荊州
去指龍沙路徒懸象闕心夜涼無遠夢不為偶聞砧
翳日多喬木維舟取束薪靜聽江叟語俱是厭兵人
牽路沿江狹沙崩岸不平盡知行處險誰肯載時輕

憔悴異靈均非讒作逐臣如遇漁父問未是獨醒人
月下江流靜村荒人語稀鷺鴛雖有伴仍共影雙飛
斗轉月未落舟行夜已深有村知不遠風便數聲砧
岸草連荒色村聲樂稔年晚晴貪穫稻閒却採菱船
古來多思客搖落恨江潭今日秋風至蕭疎過沔南
兵火有餘燼貧村纔數家無人爭曉渡殘月下寒沙
渚禽菱芡足不向稻梁爭靜宿深灣月應無失侶聲
景夕殘霞落秋寒細雨晴短纓何用濯舟在月中行

靜看秋江月風微浪漸平人間馳競處塵土自波成
咫尺愁風雨匡廬不可登祇疑雲霧窟猶有六朝僧
秋寒鴈隼捷逐雀下雲空知是江湖客無心擊塞鴻
幽懷念煙水長恨隔龍沙今日滕王閣分明見落霞
江流何渺渺懷古獨依依漁父非賢者蘆中但有磯
遠謫歲時宴暮江風雨寒仍愁繫舟處驚夢近長灘

韋應物

秋夜寄丘二十二員外

欽定四庫全書

唐詩品第
卷四十一

六

懷君屬秋夜散步詠涼天山空松子落幽人應未眠

同德閣期元侍御不至

庭樹忽已暗故人那不來祇應厭煩暑永日坐霜臺

西郊期滌武不至書示

山高鳴過雨澗樹落殘花非關春不待當由期自賒

劉云

鍾情而
語更達

寄盧陟

柳葉遍寒塘曉霜凝高閣累日此留連別來成寂寞

劉云

題寄盧陟如是此
種風氣亦復可誦

宿永陽寄璨律師

遙知郡齋夜凍雪封松竹時有山僧來懸燈獨自宿

劉云

蘇州用意常在此等故
精練特勝觸處自然

懷瑯琊深標二釋子

白雲埋大壑陰崖滴夜泉應居西石室月照山蒼然

同褒子秋齋獨宿

山月皎如燭霜風時動竹夜半鳥驚棲牕間人獨宿

閭門懷古

獨鳥下高樹遙知吳苑淒涼千古事日暮倚閭門

西樓

高閣一長望故園何日歸煙塵擁函谷秋雁過來稀

登樓

茲樓日登眺流歲暗蹉跎坐厭淮南守秋山紅樹多

聞雁

故園渺何處歸思方悠哉淮南秋雨夜高齋聞鴈來

更不須
語言

詠聲

萬物自生聽太空恒寂寥還從靜中起却向靜中消

劉云

其姿近道
語此漸起

聽江笛送陸侍御

遠聽江上笛臨觴一送君還愁獨宿夜更向郡齋聞

皇甫冉

婕妤怨

花枝出建章鳳管發昭陽借問承恩者雙蛾幾許長

秋怨

長信多秋色昭陽借月華那看閑永巷聞道選良家

同諸公有懷

舊國迷江樹他鄉近海門移家南渡久童稚解方言

山館

山館長寂寂閒雲朝夕來空庭復何有落日照青苔

送王翁信還剡中舊居

海岸耕殘雪溪沙釣夕陽家中何所有春草漸看長

賦長道一絕送陸邃潛夫

有序
不錄

高山迫欲登遠水深難渡杳杳復漫漫行人別家去

賦得送客一絕送陸鴻漸赴越

有序
不錄

行隨新樹深夢隔重江遠迢遞風日間蒼茫洲渚晚

和王給事維禁掖梨花詠

巧解迎人笑偏能亂蝶飛春風時入戶幾片落朝衣

同李三月夜作

霜風驚渡鴈
月露皓疎林
處處砧聲發
星河秋夜深

唐詩品彙卷四十一

欽定四庫全書

唐詩品彙卷四十二

明 高棅 編

五言絕句五

接武

中

皇甫曾

送王司直

西塞雲山遠東風道路長人心勝潮水相送過潯陽

欽定四庫全書

唐詩品彙
卷四十二

山下泉

漾漾帶山光澄澄倒林影那知石上喧却憶山中靜

劉方平

採蓮曲

落日清江裏荆歌豔楚腰採蓮從小慣十五即乘潮

長信宮

夢裏君王近宮中河漢高秋風能再執團扇不辭勞

朱放

銅雀妓

恨唱歌聲咽愁翻舞袖遲西陵日欲暮是妾斷腸時

題竹林寺

歲月人間促煙霞此地多殷勤竹林寺更得幾回過

李嘉祐

春日歸家

自覺勞鄉夢無人見客心空餘庭草色日日伴愁襟

白鷺

江南綠水多
顧影逗輕波
終日秦雲裏
山高奈若何

張起

春情

畫閣餘寒在
新年舊燕歸
梅花猶帶雪
未得試春衣

郎士元

山中即事

入谷多春興
乘舟棹碧潯
山雲昨夜雨
谿水曉來深

韓翃

漢宮曲二首

駿馬繡障泥紅塵撲四蹄歸時何太晚日照杏花西
繡幙珊瑚鈎春閨翡翠樓深情不肯道嬌倚鈿瑤篴

耿漳

長門怨

聞道昭陽燕嘯峨落葉中清歌逐寒月遙夜入深宮

秋日

返照入閭巷憂來誰共語古道少人行秋風動禾黍

秋夜

高秋夜分後，遠客雁來時。
寂寂重門掩，無人問所思。

盧綸

和張僕射塞下曲六首

驚銚金僕姑，燕尾繡螭弧。
獨立揚新令，千營共一呼。
林暗草驚風，將軍夜引弓。
平明尋白羽，沒在石稜中。
月黑鴈飛高，單于遠遁逃。
欲將輕騎逐，大雪滿弓刀。
野幕敞瓊筵，羌戎賀勞旋。
醉和金甲舞，雷鼓動山川。

調箭又呼鷹俱聞出世能奔狐將迸雉掃盡古丘陵
亭亭七葉貴蕩蕩一隅清他日題麟閣唯應獨不名

長門怨

空宮古廊殿寒月落斜暉卧聽未央曲滿箱歌舞衣

李端

拜新月

聞簾見新月即便下階拜細語人不聞北風吹裙帶

蕪城懷古

欽定四庫全書

唐詩品集
卷四十二

風吹城上樹草沒城邊路城裏月明時精靈自來去

送人下第

獻策未得意馳車東出秦暮年千里客落日萬家春

晦日遊曲江

晦日同攜手臨流一望春可憐楊柳陌愁殺故鄉人

谿竹逢雨與柳仲庸

日落衆山昏蕭蕭暮雨還那堪兩處宿共聽一聲猿

鳴箏

鳴箏金粟桂素手玉房前
欲得周郎顧時時誤拂絃
司空曙

金陵懷古

輦路江楓暗宮庭野草春
傷心庾開府老作北朝臣

玩花與衛象同醉

英華作
衛長林

衰鬢千莖雪他鄉一樹花
今朝與君醉忘却在長沙

寒塘

曉髮梳臨水寒塘坐見秋
鄉心正無限一鴈渡南樓

欽定四庫全書

唐詩品彙
卷四十二

晚思

蛩吟牕下月草濕階前露晚景淒我衣秋風入庭樹

別張讚

今日山晴後殘蟬菊發時登樓見秋色何處最相思

別盧秦卿

知有前期在難分此夜中無將故人酒不及石尤風

洪容

齊五筆云石尤風不知其義意其為打頭逆風也唐人詩多好用之陳子昂入峽苦風詩云故鄉今日友歡會生應同寧知已峽路辛苦石尤風戴叔倫送裴明府云知君未得去慚愧石尤風司空文明又云不及石尤風

計南朝篇詠必多用之未暇憶也

張繼

長相思

遼陽望河縣白首無由見海上珊瑚枝年年寄春燕

顧況

憶番禺舊遊

悠悠南國思夜向江陵泊楚客斷腸時月明楓子落

丘丹

答韋蘇州

露滴梧葉鳴秋風桂花發中有學仙人吹簫弄山月

聽江笛送陸侍御

離尊聞夜笛寥亮入寒城月落車馬散悽惻主人情

戎昱

別離作

一作戴叔倫詩

手把杏花枝未曾經別離黃昏掩門後寂寞心自知

暢當

別盧綸

故交君獨在又欲與君離
我有新愁淚非關秋氣悲

登鶴雀樓

迴臨飛鳥上高出人世間
天勢迴平野河流入斷山

宿潭上

夜潭有仙舸與月當水中
佳賓愛明月遊子驚秋風

李益

鷓鴣詞

湘江斑竹枝錦翅鷓鴣飛處處湘雲合卽從何處歸

幽州

征戍在桑乾年年薊水寒殷勤驛西路北去向長安

代人乞花

繡戶朝眠起開簾滿地花春風解人意吹落妾西家

感懷

間氣集作
張繼詩

調與時人背心將靜者論終年帝城裏不識五侯門

贈盧綸

世故中年別餘生此會同却將悲與病獨對朗陵翁

盧和詩

戚戚一西東十年今始同可憐風雨夜相對兩衰翁

容齋

隨筆云二詩讀之使人悽然皆奇作也

戴叔倫

關山月

月出照關山秋風人未還清光無遠近鄉淚半書間

容州回一首送陸三

欽定四庫全書

唐詩品彙
卷四十二

西南積水遠老病喜生歸此地故人別空餘淚滿衣

三閭廟

一作儲
光義詩

沅湘流不盡屈子怨何深日暮秋風起蕭蕭楓樹林

遊道林寺

佳山路不遠俗侶到常稀及此烟霞暮相看復欲歸

贈李山人

唐

此意無所欲閉門風景遲柳條將白髮相對共垂絲

夏夜江樓會別

不作十日別煩君此相留雨餘江上月好醉竹間樓

柳談

江行

繁陰乍隱舟落葉初飛浦蕭蕭楚客帆日暮寒江雨

楊子途中

楚塞望蒼然寒林古戍遶秋風人渡水落日鴈飛天

劉商

古意

欽定四庫全書

唐詩品彙
卷四十二

達曙衾衣冷開門霜雪凝風吹昨日淚一片枕前冰

登相國寺閣

晴日登臨好春風各望家垂楊夾城路客思逐楊花

雍裕之

自君之出矣

自君之出矣寶鏡為誰明思君如隴水長聞鳴咽聲

楊衡

題花樹

都無看花意偶到樹邊來

劉須溪云
來得慘淡

可憐枝上色一一

為愁開

張仲素

宮中樂

月彩浮鸞殿砧聲隔鳳樓笙歌臨水檻紅燭乍迎秋

春江曲

搖漾越江春相將採白蘋歸時不覺夜出浦月隨人

春閨

裊裊城邊柳青青陌上桑提籠忘採葉昨夜夢漁陽

令狐楚

宮中樂三首

月上宮花靜煙含苑樹深銀臺門已閉仙漏夜沈沈
九重青瑣闥百人碧雲樓明月秋風夜珠簾上玉鉤
楚塞金陵靖巴山玉壘空萬方無一事端拱大明宮

從軍行二首

孤心眠夜雪滿眼是胡沙萬里猶防塞三年不見家

胡風千里驚漢月五更明縱有還家夢猶聞出塞聲

思君思二首

小苑鶯歌歇長門蝶舞多眼看春又去翠輦不曾過
紫禁香如霧青天月似霜雲韶何處奏只是在昭陽

長相思

幾度春眠覺紗牕曉望迷朦朦殘夢裏猶自在遼西

遊春詞

閭闔春風起蓬萊雪水消相將折楊柳爭取最長條

于鵠

古挽歌

陰風吹黃蒿
挽歌渡秋水
車馬却歸城
孤墳明月裏

唐詩品彙卷四十二

欽定四庫全書

唐詩品彙卷四十三

明 高棟 編

五言絕句六

接武

下

韓愈

青青水中蒲三首

青青水中蒲
下有一雙魚
君今上隴去
我在與誰居

青青水中蒲長在水中居
寄與浮萍草相隨我不如
青青水中蒲葉短不出水
婦人不下堂行子在萬里

把酒

擾擾馳名者誰能一日閒
我來無伴侶把酒對南山

贈同遊

喚起牕全曙催歸日未西
無心花裏鳥更與盡情啼

北樓

郡樓乘曉上盡日不能回
晚色將秋至長風送月來

花島

蜂蝶去紛紛香風隔岸間欲知花島處水上覓紅雲

柳宗元

江雪

千山鳥飛絕萬徑人蹤滅孤舟蓑笠翁獨釣寒江雪

劉雲

得天趣獨由落
句五字道盡矣

登柳州岷山

荒山秋日午獨上意悠悠如何望鄉處西北是融州

劉雲

漸近
自然

零陵早春

問春從此去幾日到秦原憑寄還鄉夢殷勤入故園

劉云

皆自
精切

長沙驛前南樓感舊

公自注云昔與德公別于此海鶴指德公

海鶴一為別存亡三十秋今來數行淚獨上驛南樓

入黃谿聞猿

在永州

谿路千里曲哀猿何處鳴孤臣淚已盡虛作斷腸聲

再上湘江

好在湘江水今朝又上來不知從此去更遣幾年迴

劉禹錫

古調

軒后初冠冕前旒為蔽明安知從複道然後見人情

秋風引

何處秋風至蕭蕭送鴈羣朝來入庭樹孤客最先聞

視刀鏐歌

常恨言語淺不如人意深今朝兩相視脉脉萬重心

九日登高

世路山河險君門煙霧深年年上高處未省不傷心

甘棠館

公館似仙家池清竹徑斜山禽忽驚起衝落半巖花

別蘇州

流水閭門外秋風吹柳條從來送客處今日自魂銷

飲酒看牡丹

今日花前飲甘心醉數杯但愁花有語不為老人開

經檀道濟故壘

萬里長城境荒野草秋秣陵多士女猶唱白符鳩

南史

云當時人歌曰可憐

白符鳩枉殺檀江州

權德輿

玉臺體三首

秋風一夜至吹盡後庭花莫作經時別西鄰是宋家
昨夜裙帶解今朝蟠子飛鉛華不可棄莫是藁砧歸

萬里人行至深閨夜未眠
雙眉燈下掃不待鏡臺前
嶺上逢久別者又別

十年曾一別
征旆此相逢
馬首向何處
夕陽千萬峰
江行晚詠

古樹夕陽盡
空江暮靄收
寂寞扣舷坐
獨生千載愁
江行夜詠

猿聲到枕上
愁夢紛難理
寂寂深夜寒
清霜落秋水
曉

曉風搖五兩殘月映石壁稍稍曙光開片帆在空碧

張籍

野田

漠漠野田草草中牛羊道古墓無子孫白楊不得老

劉須

溪云
頓挫

岸花

可憐岸邊樹紅蕖發青條東風吹渡水衝着木蘭橈

劉云

好不覺
有興

涇州塞

行到涇州塞唯聞羌戍聲
道邊雙古堠猶記向安西

寄西峯僧

松暗水涓涓夜涼人未眠
西峯月猶在遙憶草堂前

題暉禪師影堂

早日欲參禪竟無相識緣
道場今獨到惆悵影堂前

梅谿

自愛新梅好行尋一徑斜
不教人掃石恐損落來花

宿雲亭

清淨當深處虛明向遠開捲簾無俗客應只見雲來

王建

故行宮

一作元
棣詩

寥落古行宮宮花寂寞紅白頭宮女在閒坐說玄宗

早發汾南

橋上車馬發橋南煙樹開青山斜不斷迢遞故鄉來

田家

啾啾雀滿樹
霽霽東陂雨
田家無夜食
水中摘禾黍

新嫁娘

三日入厨下
洗手作羹湯
未諳姑食性
先遣小姑嘗

武元衡

夏夜作

夜久喧暫息
池臺惟月明
無因駐清景
日出事還生

劉云

此語
有識

途中即事

南征復北還擾擾百年間自笑紅塵裏生涯不暫閒

春日偶作

縱橫桃李枝澹蕩春風吹美人歌白紵萬恨在蛾眉

元稹

感事

富貴年皆長風塵舊轉稀白頭方見絕遙為一沾衣

夏陽亭臨望

望遠音書絕臨行意緒長殷勤眼前水千里到河陽

西還

悠悠洛陽夢鬱鬱灞陵樹落日正西歸逢君又東去

白居易

閨怨詞

珠箔籠寒月紗牕背曉燈夜來巾上淚一半是春水

問淮水

所嗟名利客擾擾在人間何事長淮水東流亦不閒

出關路

山川函谷路塵土遊子顏蕭條去國意秋風生故關

江樓聞砧

江南授衣晚十月始聞砧一夕高樓上故園千里心

王涯

閨人贈遠四首

遠戍功名薄深閨年貌傷粧成對春樹不語淚千行
鶯啼綠樹深燕語雕梁晚不省出門行沙場知近遠
形影一相別煙波千里分君看望君處只是起行雲

花影綺陌春柳拂御溝新為報遼陽客流光不待人

李德裕

題羅浮石

清景持芳菊涼天倚茂松名山何必去此地有羣峰

嶺外守歲

冬逐更籌盡春隨斗柄回寒暄一夜隔客鬢兩年催

李賀

京城

驅馬出門意牢落長安心兩事向誰道自作秋風吟

代崔家送客

行蓋柳煙下馬蹄白翩翩恐隨行處盡何忍重揚鞭

劉云

有情
語好

呂溫

鞏路感懷

馬嘶白日暮劍鳴秋氣來我心渺無際河上空裴徊

衡州早春

病肺不飲酒傷心不看花
唯驚望鄉處猶自隔長沙

盧仝

寄外兄

何處堪惆悵情親不得親
興寧樓上月辜負酒家春

新月

仙宮雲箔卷露出玉簾鉤
清光無所贈相憶鳳凰樓

孟郊

歸信吟

淚墨灑為書將寄萬里親書去魂亦去兀然空一身

古別離

欲別牽郎衣郎今到何處不恨歸來遲莫向臨邛去

古怨

試妾與君淚兩處滴池水看取芙蓉花今年為誰死

閨怨

妾恨比斑竹下盤煩冤根有笋未出土中已含淚痕

劉云

懷近

送柳渾

青山臨黃河下有長安道世上名利人相逢不知老

河上思歸

獨訪千里信迴臨千里河家在吳楚鄉淚寄東南波

賈島

劍客

十年磨一劍霜刃未曾試今日把似君誰有不平事

尋隱者不遇

唐音作孫華
訪羊尊師

松下問童子言師採藥去只在此山中雲深不知處

裴度

谿居

門迥俯清谿
茆簷古木齊
紅塵飛不到
時有水禽啼

張碧

幽思

金爐烟靄微
銀缸殘影滅
出戶獨徘徊
落花滿明月

張祐

昭君怨

萬里邊城遠千山行路難
舉頭唯見日何處是長安

思歸樂

萬里春歸盡三江鴈亦稀
連天漢水廣孤客未言歸

穆護砂

玉管朝朝弄清歌日日新
折花當驛路寄與隴頭人

金殿樂

入夜秋砧動千聲起四鄰
不緣樓上月應為隴頭人

牆頭花

蟋蟀鳴洞房梧桐落金井為君裁舞衣天寒剪刀冷

宮詞

故國三千里深宮二十年一聲河滿子雙淚落君前

樂府

解題云河滿子開元中滄洲歌者
臨刑進此曲以贖死竟不得免

夕次竟陵

南風吹五兩日暮竟陵城腸斷巴江月夜蟬何處聲

施肩吾

古曲

可憐江北女慣唱江南曲
搖蕩木蘭舟雙鳬不成浴

幼女詞

幼女纔六歲未知巧與拙
向夜在堂前學人拜新月

文宗皇帝

宮中題

太和九年詠王涯鄭注後仇士良專權
上每登臨遊幸往往獨語左右莫敢進

問因賦

此詩

輦路生秋草上林花滿枝
憑高何限意無復侍臣知

唐詩品彙卷四十三

欽定四庫全書

唐詩品彙卷四十四

明 高棟 編

五言絕句七

餘響

李商隱

登樂遊原

向晚意不適驅車登古原夕陽無限好只是近黃昏

楊誠

齊云此詩憂

唐祚將衰也

悼傷後赴東蜀辟至散關遇雪

劍外從軍遠無家與寄衣散關三尺雪回夢舊鴛機

滯雨

滯雨長安夜殘燈獨客愁故鄉雲水地歸夢不宜秋

早起

風露澹清晨簾間獨起人鳥啼花又笑畢竟是誰春

杜牧

長安秋望

樓倚霜樹外，鏡天無一毫。
南山與秋色，氣勢兩相高。

歸家

稚子牽衣問，歸來何太遲。
共誰爭歲月，贏得鬢成絲。

許渾

塞下曲

夜戰桑乾北，秦兵半不歸。
朝來有鄉信，猶自寄征衣。

送客南歸

野寺薜蘿晚宮渠楊柳春歸心已無限更送洞庭人

長安早春懷江南

雲月有歸處故山清洛南如何一花發春夢徧江潭

溫庭筠

碧澗驛曉思

香燈伴殘夢楚國在天涯月落子規歇滿庭山杏花

客愁

客愁看柳色日日逐春深蕩漾春風裏誰知歷亂心

桂州經佳人故居

一作李
羣玉詩

桂水依舊綠佳人今不還祇應隨暮雨飛入九疑山

馬戴

秋思

萬木秋霖後孤山夕照餘田園無歲計寒近憶樵漁

江中遇客

危石江中起孤雲嶺上還相逢皆得意何處是鄉關

雍陶

春懷舊遊

吟想舊經過花時奈遠何別離長似見春夢入關多

陳陶

續古

長沙采芳客桂棹木蘭船日晚欲有待徘徊春風前

項斯

江村夜泊

日落江路黑前村人語稀幾家深樹裏一火照船歸

于武陵

高樓

遠天明月出照此誰家樓上有羅衣裳涼風吹不休

勸酒

勸君金屈卮滿酌不須辭花發多風雨人生足別離

長春宮

莫問古宮名古宮空古城唯應東去水不改舊時聲

李羣玉

古詞

一合相思淚臨江灑素秋碧波如會意却與向西流

寄韋秀才

荆臺蘭渚客寥落共含情空館相思淚孤燈照雨聲

劉駕

牧童

牧童見客拜山菓懷中落晝日驅牛歸前谿風雨惡

聶夷中

烏夜啼

衆鳥各歸枝
烏爾不棲還
應知妾恨故
向綠牕啼

儲嗣宗

垓城

百戰未言非
孤軍驚夜圍
山河意氣盡
淚濺美人衣

登蕪城

昔人登此地
丘壠已前悲
今日又非昔
春風能幾時

于濬

青樓曲

青樓臨大道一上一回老所思終不來極目傷春草

陸龜蒙

洞房怨

玉桃朝暍鬢金梯晚下臺春衫將別淚一夜兩難裁

花成子

春風等君意亦解欺桃李寫得去時容歸來不相似

東飛鳧

裁得尺錦書欲寄東飛鳬翅短脰亦短雌雄戀菰蒲

唐彥謙

小院

小院無人夜煙斜月轉明清宵易惆悵不必有離情

羅鄴

秋別

別路悲楊柳秋風淒管絃青樓人去後明月為誰圓

崔魯

三月晦日送客

野酌亂無巡送君兼送春明年春色至莫作未歸人

司空圖

古樂府

一葉隨西風君行亦向東知妾飛書意無勞待早鴻

樂府

寶馬跋塵光雙馳照路傍喧傳報戚里明日幸長楊

歲盡

莫話傷心事投春滿鬢霜殷勤共尊酒今歲只殘陽

牛頭寺

終南最佳處禪誦出青霄羣木澄幽寂疎烟汎沈寥

崔道融

班婕妤

寵極辭同輦恩深棄後宮自題秋扇後不敢怨春風

銅雀妓

歌咽新翻曲香消舊賜衣陵園風雨暗不見六龍歸

漢宮詞

獨詔胡衣出天花落殿堂他人不敢妬垂淚向君王

長門怨

長門春欲盡明月照花枝買得相如賦君恩不可移

春閨

寒食月明雨落花香滿泥佳人持錦字無鴈寄遼西

歸燕

海燕頻來去西人獨滯留天邊又相送腸斷故園秋

夜泊九江

夜泊江門外歡聲月下樓明朝歸去路猶隔洞庭秋

韓偓

效崔國輔體三首

淡月照中庭海棠花自落獨立俯閒階風動秋千索
羅幕生春寒繡牕愁未眠南湖夜來雨應識採蓮船
雨後碧苔院霜來紅葉樓閒階上斜日鸚鵡伴人愁

武瓘

唐末人或云杜荀鶴
同時人為益陽令

感事

花開蝶滿枝花謝蝶還稀
唯有舊巢燕主人貧亦歸

曹鄴

庭草

庭草根自淺造化無遺功
低回一寸心不敢怨春風

薛瑩

秋日湖上

落日五湖遊烟波處處愁
浮沉千古事誰與問東流

唐詩品彙卷四十四